



Crakeik ton iyela

**Tana rupa ke
*Stuvatum ke Crakeik tota***

(c) Damien Etcheverry

Xantof krent kan Kotava. Ewaweem daskiyin
gan Copilot TG- talpey.

Xanto : Stuvatum ke *Crakeik tota* ;
Crakeik ton iyela (4-e otuk, 2026).

Krentara is ponara is piskura skuyuna
gan Damien Etcheverry (2026).

1-e ~ Diliodafa lapira

Darekeon. Arienta mu Crakeik al tid wemtafa. Marjorie Oluikya is drig va vaj is jwapa kum moava is aka bas espanaf asuk mallapiyis va Cartagena al ko-ilkad. To kuluca tir ! Las Dueñas tursia vas jontika govitafa is saneliiskafa ewala ruldar lize caera ja jwa tir fakafa. Marjorie Oluikya rietar. Regemelton, lapira tir vumeltafa. Va toloy megol kagaelas vamo lavek dace kozwit, batcoba tir riafa disukexa koe bwaf lavok.



2-e ~ King William tota ilu zida !

Liza tiyir vumeltafa, vumeltarsafa. Kadimida *Crakeik* tota va talteon dalafa ewala ke tursia iskeyer aze va welfa kolapiyir, pune tanoy ital artu zida van sin laizon awir. Kaliapon vanlapir. Inafa brucka tuelimawer. Va englaf nilt ezas tice dalaf norisk drikon solwit. Marjorie Oluikya kan nimiela va in dizver numaz pilkomodar : va *King William* conyatota, i crakef englaf tcabanesik va tcordik, dikis va gubefa omava koe Jamaika is dirgan gan tan inaf awalkolaf volnik, i gan Whitelock totavombik !



3-e ~ Tcabanera zo bokar

Voletrakason, to arse *King William* man'o'war tota tir. Radeyesisa is vude-sisa pestaka va kot birelik moe azeba sustesir. Kottan gruper da *Crakeik* tota va man gulik vol rodelyumar : dem 74 buli is 600 detik wetce birelik is sayakik. Inafa bulisa gijarotiuca tir crakefa. Ant lankase va ina rovodivvawad : mal-saveson va sukara is ronubanucapa is baguca ke intafa bovreda is rodikison va lofe kalie. Voxis ton pirtucapa. Govol-vurded.



4-e ~ Pirtura

Lodame Marjorie Oluikya otcheteson voxnum firvitison va eliwa pu bulieem ke *King William* tota niarur, pune va platisa sukara djumimpavantar. Benplekur da wilteem di zo impar numen tota van dye *King William* tota kaliarson ronton di abdulapir. Bana tota keve sukara tigur, riwe azavzanon isen kalie ke *Crakeik* tota tatcer da inaf kaburervoliik va bulifa kulmera rodolantickid, ison dik gentim tir. Kas *Crakeik* va ina co djutedominer ?! Bocagemelton, nu-taltolapiyison niarur aze fu ronolapir.



5-e ~ Myodafa iyela

Gemelt tir myodaf, iyela loeke. Ede englik va pirtafa tiura al abditrakud, pune sinafa ronefa kaima zo egayad ise zo vajoteyed, keson va tanoya ben-plekura, isen to tena ke *Crakeik* tota titir. Arte mana solumama is kev intafa eliwa, bovreda gan bar-sanoy fixuk ko vemuxeem ik noriskeem ik cewa tan-vordavon zo klantatar. Arti abica wexa zo titicketer ike dace zo belxasitir, isen kota dolzukera vol rotitir.



6-e ~ Sin djuproxonuked

Moe *Crakeik* tota, spua tir cugafa. Kottan grupecker da intafi bli kan tanoy fem giwer. Marjorie Oluikya al benplekur. Niarutuson is mea divaykatason va eliwa, drigki moe laloy va lanyon wilt dimsoar. Edesoe tota gan bulira ke *King William* tota co zo titicketer oke co zo basnoriskatar, pune to dominera titir, vas tanoy detik kev aluboy. Mulberry moe azeba va arak ke drig bankase ervoayan dirgar. Ompe ke buli tir tuxadase, konak ital zo sollipad, fixuk va ronefi kiwastki solbured.



7-e ~ Crakeik lajububer

Tela pirtafa tiura nutceder. Gamiafa King William gejatota tir leon kalifa ise malida su zo kaiklapir, pune *Crakeik* tcordatota geon envolson ilvulter. Marjorie Oluikya tir gijaf redakik, grupes va kota suka isu salt ke vema ke Las Dueñas ewaleem. Gruper kane va tcabanera ke volnik parmon fu divvawar. Kan abica fala. Moe *King William* tota, Whitelock ape riyomer kire va dirgasik ke *Crakeik* gruper. Kotviele trakur da va ina fu konubar, pune battelya kan pirdura is ciura pu in lajudivvawar. Mancoba kotabon vol rojijar !



8-e ~ Giwas numay

Marjorie Oluikya is Mulberry va bata vema is tursia grupersed. *Crakeik* tota va vwepaf is dambapaf numay wale toloya arestafa ewala sunter, i wale La Vieja Cardena is La Nueva Cardena, lize jontika uvenda makewed. Wori *King William* tota va onkara va *Crakeik* men al ebgar nume wan labulir. Voxen ede koe abduon numay grolser, pune va djigaxo fure di klantar nume di bopelawer kire tir gamiarsafa. Giwara va tcordikeem ke Marjorie Oluikya tir borefa.



9-e ~ Gire vawa tir nuyafa

Tere liza tir, *Crakeik* tota va abrotcal is vristaf numay divlapir, nuyafa bira kabdueon fenkuwer. Re sumkadimeon, *King William* intotcafa gejatota ko Jamaika aborkon dimlapitir. Marjorie Oluikya va Whitelock jontikedje wan moretiatar ise va volplinaf setikeks kimbatar. Tove tcordiktum, ilefa tit-awaltara opelon sugdalar da eldeviel titir ec viel isen stuva wanuweter isen nuyuca va in wan nyapeter.



10-e ~ Toklize sin va jwa palseted ?

Iyela mea tir. Marjorie Oluikya wetce redakik gire va yona cugunaykafa duga al nedir, wetce ayikya rictelon is stinon gadesa va bat tcordiktum. Gadeson va ayikye siofase va datafa tarkara, dum tulon ronkafi Mulberry fimkon kesi va benplekura. Xowason vane liwot, su gorar, gruper liz sin va intafa jwa palseted. Vask koe to Dovi ewala tigitir, i koe xo grupeno gan vugtan is vartajafo gu nuve irubas rotus swavik !

